



Sesida dals

Communitgà ils

Protocol nr.

24 da schaner 2023

25 da schaner 2023

34/2023

Incumbensa da la Cumissiun per sanadad e fatgs socials (CSF)

concernent l'examinaziun da las contribuziuns dal chantun e da las vischnancas als ospitals publics per prestaziuns d'utilitad publica (emprim sutsegnader Loepfe)

Resposta da la Regenza

La revisiun da la Lescha federala davart l'assicuranza da malsauns (LAMal; CS 832.10) deliberada da las Chombras federalas en il sector da la finanziaziun dals ospitals è entrada en vigur il 1. da schaner 2009. La finamira principala da la revisiun è stada da franar l'augment dals custs en il sector staziunar dals ospitals. Per quest intent duessan cunzunt la trasparenza dals custs e la finanziaziun en il sector dals ospitals vegnir augmentadas e la concorrenza tranter ils ospitals vegnir rinforzada. Per in giudicament cumplessiv dal svilup dals custs d'ospital e da la trasparenza respectiva ston er las expensas che na vegnan betg finanzadas da l'assicuranza obligatorica per la tgira da malsauns (AOMal) vegnir resguardadas. Latiers tutgan tenor l'art. 49 al. 3 LAMal ils custs per prestaziuns d'utilitad publica (PUP). En quest connex vegnan numnads explicitamain il mantegniment da capacitads dals ospitals per motivs da la politica regiunala sco er l'instrucziun e la perscrutaziun universitara. Questa glista n'è betg cumpletta.

Per mantegnair la neutralitad areguard la concorrenza na dastgan prestaziuns da la politica sociala e dal provediment oz betg pli simplamain vegnir adossadas als ospitals e vegnir indemnizadas pauschalmain sur subvenziuns, perquai ch'ils custs ed il retgav ston esser equilibrads. Per cuntinuar en moda neutrala areguard la concorrenza cun talas prestaziuns, è vegnì stgaffì l'instrument da las prestaziuns d'utilitad publica. Quest instrument n'è dentant betg definì en moda precisa e vegn interpretà fitg differentamain.

La definiziun da las prestaziuns d'utilitad publica è er gia stada object d'ina dumonda parlamentara sin plaun federal. La resposta dal Cussegl federal è stada che la noziun na saja betg definida definitivamain e ch'ella fixeschia las prestaziuns che na dastgian en nagin cas vegnir adossadas a la LAMal. Ina confruntaziun da princip cun la qualificaziun da las prestaziuns d'utilitad publica tenor l'art. 49 al. 3 LAMal manca dentant fin ussa er en la giurisdicziun. Confederaziun, chantuns ed assicuraders da malsauns n'han correspudentamain betg definì pli precis las prestaziuns d'utilitad publica, mabain maximalmain instrumentalisà quellas per lur interess respectivs.

Sin basa da las explicaziuns qua survart èsi chapibel ch'igl exista en l'entira Svizra e betg mo en il Grischun in vast malesser davart la commensurabladad da las prestaziuns d'utilitad publica. La Regenza è da l'avis che l'examinaziun duess vegnir fatga tras in post independent.

Sa basond sin questas explicaziuns propona la Regenza al Cussegl grond d'acceptar questa incumbensa.



En num da la Regenza

Il president:

A handwritten signature in black ink, appearing to be "Peyer".

Peter Peyer

Il chancelier:

A handwritten signature in black ink, appearing to be "Spadin".

Daniel Spadin